

Danki na maneho entreguista di Henny su Gobierno:

COLONIALISTA "OME" WILLEM VAN DER VELDEN KIER DIFAMA DOOV Y DIARIO

ORANJESTAD (AAN) "Awor si awa a pasa hariña y awor si buchi di e Arubiano a yena pasobra te hasta riba nos propio suelo un colonialista racista, ta kere cu e por bin sembra abiertamente desunion y odio entre Arubianonan y Hulandesnan", esaki tabata reaccionnan cu DIARIO a haya di pueblo cu a tende kico un tal Colonialista Hulandes, Van der Velden a declara na radio y corant.

Enemigo di Aruba cu no ta laga ningun oportunidad bay perdi pa lastra tur loke cu tin di haber cu Aruba y su pueblo, a duna un tal Willem Van der Velden e oportunidad amplio pa lastra pais Aruba sin fin, hincando DOOV y DIARIO den su odio y hamber pa vengansa.

Willem Van der Velden a kere cu pueblo y DIARIO a lubida ta ken e ta y di unda e ta bin y tur loke el a haci na Aruba y pasobra Shon Henny Eman tin man wanta riba su cabez, cu e por haci y deshaci manera cu e ta haya ta bon pasobra su partido AVP pa cual el a campaña, por defende sin limite?

Wel Ome Willem bo a dal bo dede anto pisa pasobra si bo ta kere cu bo por bin lastra e corant mas grandi di Aruba esta DIARIO y kere cu bo por bay trece desunion grandi entre Arubianonan y Hulandesnan na Aruba, pa asina bo logra bo metanan comercial cu bo negoshi di permit na Aruba, anto bo a kiboca bo mes y e biaha aki mahos!!!!!!

Ome Willem a bay bisa cu ta DIARIO ta e medio na Aruba cu ta dañá e relacion cu tin cu Hulanda.

Menneer Van der Velden supuestamente a lanta un organizacion yama Vereniging voor Europese Nederlanders op Aruba, cual organizacion mester sali na vanguardia di Hulandesnan Europeo biba na Aruba.

E compay aki a bay bisa cu director di DOOV y DIARIO ta e fuentenan cu ta contra Hulandesnan na Aruba y cu director di DOOV, señor Peterson ta discrimina Hulandesnan Europeo.

Henter e asunto aki tin di haber cu Van der Velden su compania cu mester bay atende permitnan pa extranheronan cu kier bin biba na Aruba y bao di nan entre otro e grupo mas grandi Hulandesnan Europeo?

Van der Velden cu supuestamente ta papia den nomber di tur Hulandes Europeo na Aruba, ta haya cu na DOOV nan mester pone un loket separa pa Hulandesnan pasobra nan (Hulandesnan Europeo) no kier para den e mesun rij cu e prostitutan cu ta bin traha na Aruba.

Van der Velden cu kier papia di discriminacion, ta pone tur

otro hende cu no ta Hulandes Europeo riba e mesun lista di prostitutan cu ta para den rij na DOOV.

Nan kier un loket separa, nan no kier paga y riba dje nan kier trato preferencial sin limite pa asina cualkier Hulandes Europeo cu kier bin biba na Aruba, por haci esaki ora cu e ta haya ta bon.

Compay Van der Velden a lubida cu tin statuutnan di Reino Hulandes cu tin henter e stipulacionnan di admision pa Hulandesnan Europeo na Aruba regla?

Compay Van der Velden a lubida cu e discriminacion cu e ta papia di dje cu DOOV y DIARIO lo ta cometiendo contra Hulandesnan Europeo no ta worde haci aki, pero na su pais natal Hulanda contra nos hendenann di Aruba cu awor mester pasa den e ley discriminatorio Inburgerings Wet prome cu nan por biba na Hulanda?

Compay Van der Velden a lubida e tempo cu e tabata traha ilegal na Talk Off The Town caminda e tabata trata Arubianonan manera cacho y cu el a yama Arubianonan pa Luie Honden (cachonan floho)?

Compay Van der Velden a lubida cu el a horta paspoort di un

Arubiano cu el a kita di trabao y riba dje Van der Velden a confisca ilegalmente pertenencianan di e Arubiano?

Compay Van der Velden a lubida tur e mama y tatanan Arubiano cu el a kita di trabao y cu mester a acudi na departamento di Labor, cu a bay rek Van der Velden su som pe?

Compay Van der Velden a lubida cu Inmigracion dos biaha tras di otro a detene Van der Velden pasobra e tabata traha ilegal na Aruba?

Compay Van der Velden a lubida con el a lastra gobierno di Aruba y tur loke Aruba y su pueblo ta representa, ora cu el a cay sera pasobra e tabata ilegal?

Compay van Der Velden no ta menciona cu ta gobierno di Henny y segun a ser bisa, cu ta Henny lo a duna orden pa polis laga Van der Velden bay, siendo cu inmigracion cu tur nan derecho y segun ley tabata tin Van der Velden pa deporta pasobra e tabata ilegal na Aruba?

Van der Velden por splica pueblo ta di kico el a biba tur e tempo cu e tin na Aruba y si e tin permit pa ta aki y si e tin permit pa traha y pa colmo si e tin permit pa un compania di consultancy?

Van der Velden por duna cuenta na pueblo di Aruba cuanto placa Henny Eman ta paga Van der Velden como consultant di gobierno?

Ta for di ki tempo chofer di taxi di Hulanda por ta consultant di gobierno di Aruba?

Ta berdad cu e chofer di taxi aki cu a kere cu e por a bay core cu tur trahado Arubiano di Talk off The Town, cu e ta gana 15 mil florin pa luna na pago cu Henny ta dune di gobierno como consultant?

Awor pueblo un biaha mas ta haya sa con Henny e entreguista mayor ta hiba su tactica pa asina laga colonialistanan podera di pais Aruba y trapa riba e pueblo di Aruba.

Ta e mesun Van der Velden aki, Henny Eman y AVP a haci uzo di dje pa den campaña trata di uni Hulandesnan Europeo pa asina nan vota pa AVP, despues cu nan a reuni na grandi den un hotel.

Ta pa e compay Van der Velden aki, AVP a terrorisa un trahado di

DOOV, cu manera un esclavo mester a bay obligatoriamente na e encuentro Hulandes di AVP na hotel, caminda nan a sinta haci bofon di e Arubiano y riba dje humilia e Arubiano.

Director di DOOV e tempo ey no a guli e pildora aki y el a manda un carta bon pica pa Henny Eman, pa asina laga Henny sa cu nan no por djs hisa benta y kere cu DOOV y su empleadonan por ser uza na un forma cruel asina, pa favorece cierto Hulandesnan Europeo cu AVP lo a haya como votadornan.

Compay Van der Velden wanta duro pasobra awor si DIARIO ta bay saca bo keshi colonial y racista pa bo pasobra e unico lugar caminda bo ta pertenece, ta den e Roversnest di Bolkestein na Hulanda y no aki caminda Arubianonan a biba pa siglonan largo y lo sigui biba pa hopi tempo mas den bon harmonia cu Hulandesnan Europeo cu ta stima Aruba.

**TELEFONNAN DI DIARIO
826747- FAX 828551**

HARI JAN HARI!!

